

Uunga siunnersuut: Inatsisartunut aalajangiiffigisassatut siunnersuut Naalakkersuisut peqquneqassasut siunnersuuteqaqqullugit eqqussukkanut akitsuutit pillugit inatsisartut inatsisaat nr. 19 30. oktober 1992-imeersup allanngortinneqarnissaanik, taamaasillutik kaffinnut akitsuutit eqqartorneqartoq § 1, nr. 11 atorunnaarsillugu.

(Inatsisartunut ilaasortaq Jens-Frederik Nielsen, Demokraatit)

Uunga siunnersuut: Inatsisartunut isummerfigisassatut siunnersuut Naalakkersuisut peqquneqassasut siunnersuuteqaqqullugit eqqussukkanut akitsuutit pillugit inatsisartut inatsisaat nr. 19 30. oktober 1992- imeersup allanngortinneqarnissaanik, taamaasillutik tiinut akitsuut eqqartorneqartoq § 1, nr. 11 atorunnaarsillugu.

(Inatsisartunut ilaasortaq Jens-Frederik Nielsen, Demokraatit)

Uunga siunnersuut: Inatsisartunut aalajangiiffigisassatut siunnersuut Naalakkersuisut peqquneqassasut siunnersuuteqaqqullugit eqqussukkanut akitsuutit pillugit inatsisartut inatsisaat nr. 19 30. oktober 1992-imeersup allanngortinneqarnissaanik, taamaasillutik neqinut akitsuutit eqqartorneqartoq § 1, nr. 13-17 atorunnaarsillugu.

(Inatsisartunut ilaasortaq Jens-Frederik Nielsen, Demokraatit)

Uunga siunnersuut: Inatsisartunut aalajangiiffigisassatut siunnersuut Naalakkersuisut peqquneqassasut siunnersuuteqaqqullugit eqqussukkanut akitsuutit pillugit inatsisartut inatsisaata allanngortinneqarnissaanik, taamaasillutik sukkunut, lakridsinut sukkulaatinut il.il. akitsuutit atuutilersinneqartup § 1, nr. 1-2, Inatsisartut inatsisaanni nr. 23 18. november 2019, atorunnaarsinneqassasut.

(Inatsisartunut ilaasortaq Jens-Frederik Nielsen, Demokraatit)

Akissuteqaat

(Aningaasaqarnermut Nunamullu Namminermut Naalakkersuisoq)

Siullermeerneqarnera

Nunatsinni inuuniarnerup akikinnerulernissaa siunertaralugu, akitsuuserneqartartunut arlalippassuarnut akitsuutinik appartitsinissamut atorunnaarsitsinissamullu aalajangiiffigisassatut siunnersuutinik saqqummiussineranut Jens-Frederik Nielsen Naalakkersuisut sinnerlugit qutsavigerusuppara.

Akitsuutit amerlanersai ullumikkut inuulluarniutinik inuulluataarutinillu atuinermut akitsuutaapput. Akitsuutit suliaqarnissamik pissuteqartumik eqqussinermut

akitsuutikkoortumik akilersinneqartarput, tassanngaaniillu iluanaarutit pisortat aningaasartuutaannik aningaasalersuinermit annertuumik tunngavigineqarput.

Siunnersuutigineqartut neqinit tunisassianut, kaffinut, tiinut akitsuutit atorunnaarsinneqarnerat kiisalu sukkunut, lakridsinut sukkulaatinullu akitsuutit appartinneqarnerat, iluanaarutissanik annaasaqarnermik malitseqartussaavoq, suliniutissanut allanut pingaarnersuinernullu sanilliullugu nalilersorneqartussaalluni.

Aningaasanut inatsimmi ingerlatsinermit tapiissutinullu aningaasaliissutini tamani 1 procentimik 56 mio. kroninut naapertuuttumik, ataatsimut isigalugu sipaaruteqarnikkut siunnersuutit aningaasalersorneqassasut, siunnersuuteqartup siunnersuutigaa. Siunnersuutitut sisamaasunut Nunatta Karsip ataatsimut katillugu aningaasartuutissai ukiumut 30 mio. kroninik annertussuseqarput.

Taamaattoq sioqqutsisumik misissuinani, tamatumalu sunniutissai qulaajaaffiginagit, ataatsimut isigalugu sipaaruteqarnissaq piviusunngortinneqarsinnaangitsoq Naalakkersuisut isumaqarput. Assersuutigalugu kontunik pingaarnernik peqarsinnaavoq Namminersorlutik Oqartussat isumaqatigiissutitigut pisussaaffeqarfigisaannik. Tamatuma saniatigut taamatut sipaaruteqarnermi Namminersorlutik Oqartussat qitiusumik allaffeqarfiat kisimi pineqartunut ilaatinneqartussaangilaq, kisianni aamma sullissiviit ataaniittut aamma Namminersorlutik Oqartussat ataanni tapiissutit pineqartunut ilaatinneqartussaallutik, soorlu peqqinnissaqarfimmi suliassaqarfik aamma ilinniartitaanermit suliassaqarfik. Tamatuma saniatigut Nunatta Karsiani aningaasat annertuumik allatut pingaarnersuiffigineqarnerat 2022-mut aningaasanut inatsisissamut siunnersuut pillugu politikikkut isumaqatiginninniarnermut ataqatigiissillugu pisariaqarpoq.

Naalakkersuisut taamaalillutik isumaqarput Jens-Frederik Nielsenip siunnersuutai soqutiginaateqartut, kisiannili isumaqarlutik akitsuuserneqartartut aamma akitsuutit annertussusaat, imaluunniit immikkut akileraarutitut akitsuutinullu suliassaqarfimmi suliniutit, pillugit oqallinneq, akileraartarnermit suliassaqarfimmi suliniutissanut pilersaarutigineqartunut allanut ataqatigiissillugu ingerlanneqartariaqartoq. Taamaaliornermi siunnersuutit aalajangersimasut Kalaallit Nunaanni siunissami akileraarutitut akitsuutinullu ilusiliussassanut isumaliutiginninnernut ataqatigiissillugit suliarineqarnissaat qulakkeerneqassaaq.

Naalakkersuisut naatsorsuutigaat akileraartarnermi iluarsaaqqinnermik suliaqarneq 2021-mi ukiaanerata ingerlanerani aallartinneqassasoq. Partiit nutaamik akileraartarnermi iluarsaaqqinnermik suliaqarnerup ingerlanerani ilaatinneqassapput.

Taama oqaaseqarlutik Naalakkersuisut allanguutissat siunnersuut tulliuuttoq saqqummiuppaat:

”Naalakkersuisut akileraartarnermit akitsuusiisarnermullu aaqqissuusseqqinnissamik pilersaarutigineqartumut ataqatigiissillugu, nioqqutissat eqqussorneqartut akitsuutaasa

allangortinnissaannut periarfissamik misissuinissamik peqquneqarnissaat pillugu
inatsisartuni aalajangiiffigisassatut siunnersuut.”